

Aprobada inicialmente polo Pleno do Concello en sesión ordinaria celebrada o día 11 de xaneiro do 2006 o Regulamento Municipal de uso do idioma galego na Administración Municipal de Corcubión, e sometido a información pública polo período de trinta días hábiles mediante anuncio inserto no BOP número 27, de 2 de febreiro de 2006, sen que fose presentada durante o citado período alegación algunha, faise pública a aprobación definitiva do devandito regulamento, así como o texto seu íntegro, en cumprimento do citado acordo plenario e de conformidade co disposto nos artigos 49.c) e 70.2 da Lei 7/1985, de 2 de abril, Reguladora das Bases do Réxime Local.

## **ANEXO I**

### **PREÁMBULO**

A lexislación vixente debuxa un marco que compromete os poderes e institucións públicas na tarefa da normalización da lingua galega. O Estatuto de Autonomía de Galicia dispón que os poderes públicos potenciarán o uso do galego en todas as ordes da vida pública, cultural e informativa (art. 5.3). A Lei de Normalización Lingüística sinala os obxectivos concretos en materia de normalización lingüística no ámbito institucional, indicando que o galego, como lingua propia de Galicia, é a lingua oficial das institucións da Comunidade Autónoma, da súa Administración, da Administración Local e das Entidades Públicas dependentes da Comunidade Autónoma. (art. 4.1).

Conforme o marco devandito, o Concello de Corcubión comprométese solemne e formalmente mediante este regulamento a elevar o galego ao rango de lingua oficial e a facer o seu uso normal. Ora ben, a situación de cooficialidade lingüística vixente, o pretendido avance no proceso de normalización do idioma galego e o multilingüismo do noso ámbito social europeo poden dar lugar á aplicación de criterios lingüísticos diversos para situacións comunicativas idénticas. Por mor de desenvolver no seo da súa propia administración os preceptos devanditos, de dotarse dun marco de referencia globalmente válido, e de homoxeneizar a súa imaxe corporativa en materia de lingua, o Concello de Corcubión aproba o seguinte Regulamento de Uso do Idioma Galego na Administración Municipal de Corcubión.

## **REGULAMENTO DE USO DO IDIOMA GALEGO NA ADMINISTRACIÓN MUNICIPAL DE CORCUBIÓN.**

### **CAPÍTULO I**

Art. 1.O galego, como lingua propia de Galicia, é o idioma oficial do Concello de Corcubión.

Art. 2. O Concello de Corcubión empregará o idioma galego nas súas actuacións administrativas internas e nas relacións cos cidadáns e coas Entidades Públicas situadas en Galicia.

Nas relacións coas persoas ou entidades radicadas fóra do territorio da nosa Comunidade Autónoma, o Concello poderá empregar o castelán ou outra lingua oficial do lugar onde residan aquelas.

## **CAPÍTULO II**

### **Das resolucións e da documentación administrativa.**

Art. 3. Serán redactadas en galego:

a) As convocatorias das sesións de todos os órganos colexiados da Corporación e nomeadamente as do Plenario, Xunta Local de Goberno, comisións informativas, consellos sectoriais e tribunais de oposicións e concursos.

b) As actas das sesións dos citados órganos municipais.

c) As resolucións do alcalde, dos concelleiros delegados e o seu Libro de Rexistro.

Art. 4. A documentación dos expedientes administrativos que dean lugar á adopción dos acordos e resolucións referidos no artigo anterior tamén será redactada e tramitada en galego, idioma no que se elaborarán os modelos de documentos impresos.

Nos planos e procesos de informatización e racionalización administrativa deberase ter en conta o citado obxectivo.

Art. 5. Os documentos contractuais subscritos polo Concello serán redactados en galego.

Se a outra parte contratante o solicita ou o negocio deba producir efecto fóra do territorio da Comunidade Autónoma, poderá ser redactado tamén en castelán.

Art. 6. Sen prexuízo do que para os rexistros públicos establece o art. 9 da Lei 3/1983, nos rexistros administrativos das oficinas do Concello os asentos faranse sempre en galego, independentemente da lingua na que estean escritos.

## **CAPÍTULO III**

### **Atención ao público**

Art. 7. Os servizos de información e unidades administrativas que teñan unha relación co público máis intensa promocionarán o uso do idioma galego mediante a súa utilización como lingua normal de comunicación e a información aos cidadáns dos seus dereitos lingüísticos, de acordo cos criterios de máximo respecto e non discriminación.

O disposto no presente artigo tamén é de aplicación ás empresas ou entidades que presten servizos públicos municipais por concesión, arrendamento ou concerto.

## **CAPÍTULO IV**

### **Cargos públicos**

Art. 8. Os cargos do Concello expresaranse xeralmente en galego nos actos públicos celebrados en Galicia, sempre que a intervención sexa por razón do propio cargo.

## **CAPÍTULO V**

### **Relación coas empresas privadas.**

Art. 9. Os estudos, proxectos e traballos semellantes que o Concello encargue a terceiros dentro do ámbito territorial galego terán que ser redactados en idioma galego, aínda que a súa finalidade esixa tamén a redacción noutra lingua.

## **CAPÍTULO VI**

### **Anuncios e publicacións**

Art. 10. Os anuncios oficiais do Concello que se publiquen nos diarios oficiais ou en calquera medio de comunicación radicado no territorio da nosa Comunidade Autónoma serán redactados en galego.

Art. 11. Con carácter xeral, as publicacións editadas polo Concello, teñan ou non carácter periódico e as campañas de divulgación e publicidade realizaranse en lingua galega.

## **CAPÍTULO VII**

## **Topónimos, sinalizacións e rótulos.**

Art. 12. Consoante o que dispón o artigo 10 da Lei 3/1983 de normalización lingüística, a única forma oficial dos topónimos do territorio municipal do Concello de Corcubión é a galega igual cá dos demais topónimos de Galicia.

Art. 13. Os rótulos e sinalizacións da Casa do Concello e dos outros edificios e servizos públicos e da rede viaria municipal serán redactados en idioma galego.

Cando o interese xeral o requira tamén se poderán redactar noutros idiomas.

## **CAPÍTULO VIII**

### **Do persoal ao servizo da Corporación.**

Art. 14. A declaración de oficialidade do idioma galego esixe que todo o persoal ao servizo do Concello estea en condicións de empregalo nos dous niveis, oral e escrito, de acordo coa natureza do seu posto de traballo.

14.1 Para acadar este obxectivo establécense as seguintes regras:

a) O persoal que actualmente traballa ao servizo da Corporación e non estea capacitado para o uso do galego, de acordo co disposto no art.14 deste Regulamento, deberá adquirir tal coñecemento. Con ese fin, o Concello desenvolverá programas de formación e perfeccionamento.

b) Nos procedementos de selección do novo persoal incluírase unha proba de coñecemento da lingua galega adecuada ao nivel e contido da praza convocada.

c) Nos procedementos de provisión de postos de traballo, o coñecemento da lingua galega terá a consideración de mérito.

## **CAPÍTULO IX**

### **Relación con outras administracións.**

Art. 15. As actuacións realizadas polo Concello perante os órganos de Xustiza faranse en lingua galega, consignándose sempre por escrito o cumprimento do artigo 7.2 da Lei 3/1983 de Normalización Lingüística, relativo á utilización da lingua galega por parte da Administración de Xustiza.

Corcubión o 17 de marzo de 2006

O ALCALDE PRESIDENTE

Aasdo.: Francisco Javier Lema Fuentes

